

LA GRAND PRONOSTICATION NOUVELLE AVEC PORTENTEVE-
fe prédiction, pour l'An M.D.LVII. Compofee par Maiftre Michel de noftre Dame,
Docteur en Medicine de Salon de Craux en Prouence. Contre ceux qui tant de foyes
m'ont fait morts. Immortalis ero vivus, morienfq. magifique, Pofit mortem nomen viuet
in orbe meum.

AVEC PRIVILEGE DV ROY. / A PARIS. / Par Jaques Keruer, Rue faint Jaques
à l'enfeigne des deux cochetz. 1557.

Cote et fonds: **B.ARBAUD (AIX EN PROVENCE)**

BENAZRA Pag 22

LA GRAND'
PRONOSTICATION
NOUVELLE AVEC PORTENTE V-
se prediction, pour l'An M.D.LVII.

Composée par Maistre Michel de nostre Dame,
Docteur en Medicine de Salon de Craux
en Prouence.

Contre ceux qui tant de fois m'ont fait mort,
Immortalis ero viuis, moriensque. magisque,
Post mortem nomen viuet in orbe meum.



AVEC PRIVILEGE DV ROY.
A . P A R I S .

Par Jaques Keruer, Rue saint Jaques à l'enseigne
des deux cochetz.

1557.

A TRESEXCELLENT, NOBLE ET PVISSANT
Roy de Navarre, Anthoine de Vandomme, Michel de
Nostre Dame son treshumble & obeissant serui-
teur, vie longue & felicité.

A Bien bone raison, tresredoubté Sire, à tousiours esté l'ignorance estimee esté cause de tous maux, & empeschement de tous biens, d'autant qu'il est impossible d'euitier vn mal auquel on ne pense point, ny de iouir d'un bien qu'on n'entent point. Pource voyãs les anciens philosophes que le plus grãd don de Dieu estoit le scauoir, ont addonné leur esprit à la cõgnoissance des choses pour dõner moyẽ aux hõmes pour se gouverner: les auisans des accidens qui suruiennent parmy les entreprinsees humaines. A l'exemple desquelz me suis appliqué à speculer les significations des choses occultes, & les declairer d'an en an, selon que mõ petit esprit peut comprendre, Et combié que ie n'aye encor esté si heureux de pouuoir voir vostre maiesté en face, toutesfoys par les numismes & par la phisionomie de Messieurs voz Tresillustres freres, me suis assureé au bruit constant de voz Royales bontés: & ay prins la hardiesse de vous dedier partie de mes labeurs: qui est la calculation de ce que les astres demonstrent pour la presente annee 1557. Cõbien que plus amplement ie l'aye declaré en l'Almanach avec les predictions que i'ay consacré au plus grand des Roys. Et me confiant tresdebonnaire Sire, que vous le receurez de vostre naturelle & accoustumee humanité. En priant le grand Roy eternel qu'il vous doint grace de regner en paix longuement, & à moy de voir en brief le souuerain Seigneur de Biarnoys. De Salon ce 21. de Mars M.D.LVI.

Faciebat Michael Nostradamus Salone petreæ Prouin-
ciæ. 21. Martii. 1556. pro anno 1557.

De la disposition generale de la presente annee 1557.
iouxte la prediction des celestes images.

M *Ars arma necesse, sanguinum molitur opus: & omnis in
Italiam tendit furor, & confertum Rex agmen agit.*

A quoy Seigneur par qui le mien escrit réd:
cōbiē que les principaux monarques Chre-
stiens ayent fait certaine cōditure de paix,
ou treuē, tendāt à certaine ou incertaine fin volontaire,
si est ce que ie ne treuue nullement par mes calculations
paix ne treue, & si par les volontez humaines, mesmes
des Roys & Princes qui sont ames, diuinement par la su-
preme presque puissance de Dieu, crees & infuses à cer-
tains corps, ormis l'humanité d'un supercelestiel & can-
dide arrousement: & le tout calculé. ie treuue au pais Ita-
lique estre ce que par l'oposition de Saturne & de Mars
presagent les astres, & combien que les effets ne soyent
beaucoup addōnez à la pacifique quietude, ce nōobstāt
est preparé cestuy an le fleau du grand Dieu eternal que
ie crains, & duquel i'ay grand doubte, que cestuy an, tant
par pestilence, famine, guerre, & oppressiōs, que par l'ire
de Dieu, que le peuple humain ne soit presque à ses extre-
mes diffinements. Et si vouldrois icy declairer quelques
grands points principaux touchant l'vniuerselle disposi-
tion de l'annee, tāt des tumultes belliques & subite mu-
tation de monarque hierarchie, que par expoliation de
peuple, regions, & autres que ie n'ose proferer la centiē-
me partie de ce que ie pouroys amplemēt specifier, mais
voyant la calomnie de ceux qui tāt de foyes m'ont fait
trucide que encores ie presage, mais la grande esperan-
ce qu'un chacun aura plus ceste annee au grand Dieu e-
ternel & à tous les saincts, qu'il ne nous arguera point

en sa fureur, ny ne nous corrigera point en son ire: mais vsera (si luy plait) enuers nous de ses grandes miserations combié que son glaiue soit euaginé & luisant pour nuire aux humains: & auant que l'an soit passé, & quelque peu de l'an 1558. on verra manifestement presque par tout le pays d'Italie, tant d'exorbitâtes mutations qu'onques on aye veu ny entédu: & celuy en qui l'on cuidoit auoir grande esperance le tout sera changé, frustré, mué, & cōtrarié. Le conseil sera de ne receuoir Gaulois nullemēt, ny recongnoistre pour leur supérieur. Celui à qui tant d'hōneurs & caresses ont esté faictes par autres mutatiōs de tempestes sera (ie ne dis) reuolté. la plus part du pays Italique le viendra suborner, à quoy il condescendra, & fera plus qu'heureux celuy Gaulois de l'ordre equestre, qu'il ne sera au royaume Latin, à cause que nul eclipse ne nous aparoistra cestuy an. *Nil petit obscurum, nec condit se Luna tenebris. In furias speculatur opes, Gallorum populus* tant par mer que par terre. Le treuve des calamiteuses vexations qui ne serōt guieres moindres que celles que par les sinistres apparences demonstrent les cieulx *versus incubriae fines.* & ie ne veux laisser à mettre par escript que ceux qui trop se sont hastez, ne feront pas à demy ce qu'ilz cuidoient, & le tēps sera fort estrange au respect des autres annees. combié que ie l'aye amplemēt declairé par les presages & Almanachz de cestuy an. Et seront des tempestes, tōnerres, gresles, & autres fulgurations, & impetuosité de pluyes, que pche la saison à cueillir presque en plusieurs pays sera melliné & vëdangé, & dans vne maison ou seront sept, ny seront que troys. Brief ie voy cestuy an estre de tyrannique prediction, à cause que deuers les parties septentrionales & occidentales mesme de l'Europe, cō-

bien que deuers les Affricains seront infinies tumultes belliques par les Chrestiens de l'Asie contre les habitas d'Egipte & la proche : mais deuers les lieux principaux de l'Europe septentrionale , & aux plus basses que nous descriuons haultes, cōme aux fins Britāniques seront les regnes tētez par monarques superieurs soy rebeller contre ses plus grans supremes : mais à cause que Mercure, Iupiter & Saturne aiant son principal aspect fait la Republi. Londine repugner de tout diamettre, iceux Britāniques aians consacré leurs principaux dieux aux fins & terroirs Aquitaniques, font apparoir les celestes images de ceste annee ny auoir nulle emotiō ne tumulte : combié que par la mer Occéane par les Hesperiens passans le fretum Herculeum susciter quelques ires par inflammation de cœur antique par incredible cupidité de certaine vengeance d'intestine conuration, mais le tout iustement supputé les septentrionaux ne seront cestuy an qu'en leur propre & volontaire repos: mais tendant deuers les regions ou Aries vient à predominer, & aux circonuoisins lieux les guerres, pestilences, famines, partialitez, empoisonnemens de puits & de Fontaines, diuers explorateurs enuoyez , personnes qui parleront diuerses langues , & donneront à entendre les secretz des Princes. Deuers le commencement de l'Annee seront faites telles partialitez , que celuy qui sera esleu precogitera l'imporueue facherie des siens progeniteurs, sera la plus part opposite de ce qu'on pretendoit de luy. Seront chafés, profligés, mis en extreme calamité ceux qui en leurs regions naturelles viuoient en paix & bōne tranquillité. Je treuue pour l'An present 1557. & 1558. que seront plusieurs nauigans passans les mers , voulant exposer leurs

personnes par noblesse de sang que intrinsequemēt auront le symbole d'occasion & de penitence : mais quoy que sera la chicheté tarde au font , d'autre part opposite qui se seront partis vaillāment : mais il se prepare icy que ie voy , c'est le 20. de May , que ie suppute ceci deuers le païs d'Italie vne secrete & intestine machinatiō , pour dechasser ceux qui par grandes prieres dissimulees ont passé les mons Apennins , & sera la plus part expoliee.

L'inuincible monarchie , qui serōt les Gaulois , ie ne dy assiegee & tentee , obsidion & close la mer mediterrannee , l'vn est qui continuellemēt veille , seront quatre surprins , qui auoient deliberé de faire quelque prodicion , sera descouuerte la neufue. Au principal point sera faicte ceste constitution facherie volontaire. Celuy qu'on cuydoit perdre par voyages marins & terrestres , sera appelle le second Iason. Vn autre grand enuoyé pour ne donner empeschemēt au conseil , sera grandement esloigné de quatre voyes seront explorateurs , & sera surprins vn qui faindra estre ennemy mortel , qui donnera à entēdre tout le fait & les parolles , la simulté & fainte dissimulation sera si grande , que par nul siecle passé elle ait esté. le deffaillement de l'vn sera faite vne grande mutation , & Lieures arracheront le poil de la barbe du Lyon.

Aussi apres la confirmation du nouveau monarque par ses plus proches esmeu & souuent stimulé de laisser son propre pays en paix & tranquille prosperité ne voudra nullement faire poursuiure ses premieres & inopinees entreprinsees , mais sera contraint de totalement les delaisser & adherer contrariant aux premieres entreprinsees , voulāt mettre en effect sur le 22. de Mars. quel cas vient à presager l'opposition de Saturne occidéal à Mars

oriental , que à ce que les astres font apparoir quelques grandes emotions de guerre contre les orientaux infideles, & eux semblablement cōtre les Chrestiens, & deuers la fin de l'Automne la enuiron plusieurs par mer & par terre. & ce que lon croit publiquement , ne durera pas longuement, ny ne sortira à demy effect. Le conseil qui sera tenu sera tard aduisé. les assemblees seront de repentance tarde , seront enuoyes en diuerses regions, les vns se banderont cōtre les autres. Ceux qui de long tēps sont mutinez se r'allieront, & feront vne faincte dissimulation. Les estrangers profligez apres les tumultes & seditions assoupies se leueront contre les citoiens, sera faite vne nouvelle alliance , que pour vn peu de temps sera faincte pacifiquement , & ne durera pas si longuement, que durera le trium virat: mais seront bien tost restituez en leur premiere sedition & querelle. & sera faite vne subite & tranquille mutation. Les Chrestiens du leuant & des mers mediterranee, Sicule, Ligustique, Corsique, Adriatique, & Sardaigne par les iustes Barbares & subites inuasions par mer & par terre, souffriront beaucoup : & plusieurs pillars seront pillez, & expoliez de leurs biens, & ceux qui tenoient captifs , des vngs seront eux mesmes, captifs . Brief avec toute celle couleur pacifique sera vne mortelle guerre, tant entre humains, que deuers plusieurs qui n'auront autre que forme humaine, & se trouuera plus de clemence & d'amitie aux bestes farouches, que ne trouuera ceste annee l'homme à l'homme, que pour ne faire si grand discours de ce que bonnemēt n'est ia necessaire le tout spécifier, que prierons tretous (aussi seront ilz faites entre les Chrestiens prieres vniuerselles) le grand D I E V omnipotent, & toute l'vniou

celeste , qu'il nous vueille preseruer ceste annee de tant de disgraces que les Astres no⁹ font apparoir, & que celle tant desiree paix nous aduienne. Amen

Du Printemps 1557.

Le Printemps ceste annee 1557. entrera le xi. iour de Mars, le Soleil entrant au premier poinct d'Aries, au. deg. 53. mi. d'Aries, pour la Lune, & autres planettes selon leurs sieges, sera humide, qui deffaudra au besoing avec vents & mutations de temps, mais à cause du signe de la diuision des estoilles, donnera seure & tranquille temperature, avec vne extreme chaleur, qui à la fin du printemps sera conuertie à grande ardeur & inflammation, iouxte les celestes & superieurs mouuements. L'apparence des disgraces est tant manifeste, que le commencement ormis bellicques emotions, qui seront de grand bruit, & plus de terreur que de fait: combien que tel cuidoit qu'il ne fust besoing de combatre ne par mer ne par terre, qui demeurera au grand conflict. Tout le deuant blessé passera les vmbres: sera empechable par froidure & humidité, & seront pluyes, mais à cause que la tardité est fort seiche, seront quelques iours mediocrement attrempez, puis le temps peu à peu, toute la temperature tendra à extreme seicheresse & qualitez contraires à naturelles humidités, & iours bien mauuais & de bonne duree deuers le pays occidental à la haultesse de 49. deg. & de longueur 30. pour la Lune presage grandes & superflues humiditez, & tendant plus prochaine du pentapotamos, qui est à 48. seront deuers le commencement de la Vere pour l'occidentalité de Saturne, & qui est en Aries presageant seicheresse & adustion, mais Iupiter, Mars & Venus presagent à l'oposite, c'est assauoir
qu'e

qu'elle fera froide, humide avec pluyes, grands vêts, neiges, glaces, tēps fort diuers, mesmes depuis Lyon, Moulins, Bourges, Orleans, Paris, Nantes, Tours, Rouan, & autres pays circonuoisins. le pays Septétrional & Occidental, les neiges & pluyes frequentes feront grādes inondations d'eaux & accroissances de fleuue, non sans perilleuses & dommageables submersions, que lon cuidera le regne Deucalion approcher: mais ce ne sera que deuers le pays de Germanie & Lorraine, encores plus en Angleterre: car au climat de 45. degrez les pluyes commenceront à defaillir presque au milieu du Printemps, & mesmes dans la fin de l'hiuer. Feurier ne fera pas son deuoir dans le pays de Piedmont, & de Lombardie, les pluyes seront fort frequentes. Naistront dans ce Printemps plusieurs monstres, mesmes vn apud Bituriges, & Cenomanes brutalement, qui presagera ce que prochainement lon congnoistra aduenir. Aussi en naistront in terra Norica par deça plus pres, qui aura destendue de son aduenement vingt & vn moys du iour mesmes de sa natiuité, & sera terriblement difforme. Vn autre sera trouué aux Saxons in vtero vaccæ, & en Prouence plusieurs de peu de vie. Et en ce temps regneront grandes pleuresies, avec vne douleur pongitiue au cousté, & difficulté de respiration, grand toux, catarres de plusieurs & diuerses sortes, reumes innumerables, que ceux du 48. degré en seront si abundans, qu'ilz n'oseront sortir de leurs maisons, avec paralyses & apoplexies. au moys de Feurier tombera quelque grand prélat, & dans le temple, & plusieurs douleurs des yeux. Vtay est qui seront plusieurs iaunisses, hydropiques, & de plusieurs & mauuaises couleurs, distillations d'vrines aux vieux & diffi-

B

culté d'icelle, & encores quelques diffenteries procedantes de l'annee passée, & portera aussi solution que plusieurs fieures quartes perdront leur periodique cours, à aucuns quelque flux de sang par la gorge, & par le voir, mesmes aux plus' ieunes, & deffailance de pluyes: & ne sera sans quelques tonnerres fulgentes, choruscations, gresle, tempeste, mesmes aux lieux alienez de large plaine, & combien que Mercure soit icy conioinct avec Saturne, ou Saturne avec Mercure presagent quelques demy assoupiment de guerre, & commotion d'armes, & maladie de mortalité, comme peste mesmes les ieunes gents par fieures continues, agues de subit iugemēt, & d'autres terribles maladies, parquoy par l'avis des sages medecins, chascun fera bien de soy preparer à la purgation & saignee au paravant, pour obuier à la malice du temps que les astres presagent. Et quand au fait bellique, qu'aussi les astres menacent les troys parties du monde de grandes & cruelle preparations à effusion de sang, tant par conflict, que par precipitees embusches, mesmes le pais Italique contre le Belgique, & de peu de duree, & la grand fleur sera proche de la vigilance & estude, nonobstant paches seront interrompues: les emotions seront grandes, que vn chascun prie ce grand Dieu eternal par son filz Iesus Christ par l'intercession des saincts qu'il vueille appaiser son ire, & mitiguer les monarques, que ce que sera à demie deliberation se vienne à paracheuer: car le tēps est fort preparé à mortelle guerre, quoy qui parle au contraire l'effect se verra. aussi à ce que ie treuve la paix pour le present quād à l'exaltation de France par ceste annee n'est nullement commode, & trouuera on que portera plus d'incōmodité que de cō-

modité, & plus preiudicier au regne que profiter à moy ne concerne que de metre tant seulement ce que iouxte la congnoissance que Dieu ma dōné de presager: lequel par sa grace vueille que tout soit à sa digne louāge amē.

DE L'ESTE.

L'esté ceste annee 1557. commencera le 12. de Iuin, le Soleil entrant au premier poinct de Cancer, à 26. minutes, la Lune à 5. degr. 18. minu. de Capricor. Saturne oriental, meridional descendant combuste à 7. deg. 48. minu. de Taurus, & le reste selon leur ordre, que le tout calculé sera en son commencement chaud & sec, tendāt plus à seicheresse qu'a chaleur, que selon l'esctit de Haamor Tyberides par aucunes reuolutions faites iouxte l'ascendant, que cest esté sera par son cōmencement d'une extreme ardeur & seicheresse, tellement que plusieurs pays par l'impatience de l'inflātion estiuie serōt presque bruslez: combien que le temps soit totalement adōné à chaleur, si est ce que seront quelques iours humides, & aussi combien que le Soleil soit en son plus haut degré du Solstice, ie treuve que seront quelque pluyes: mais rares, prouenantes d'impetuosité de tonnerres & fulgurations, aussi au commencement à 47. 48. 49. degrez seront broillats, qui porteront preiudice, & par la longue seicheresse vers le milieu du Primtemps passé courront vêtz Septentrionaux & occidentaux, mesmes Nhort, qui endommagera plusieurs fleurs, aussi courront vents froids & glacialz, qui passeront sans endommager les biens de la terre, pour cause que pour lors que ilz souffreront ne seront nullement à la superficie humides, qui sera cause salutifere du bien: mais ce principe

d'Esté tant par maladies , famine & pestilence, que par tumultes & commotions de guerres , sera grandement à craindre, que sera chose bien salubre d'auoir prié Dieu omnipotent qu'il luy plaise secourir le pauvre peuple, & toute humaine creature qui le craint, & ayme, & faire que cest esté ne soit moins à craindre que le passé, ou toutes les planettes estoient à Cancer & à Leo.

et nostrum quidem humanū est consilium: sed de rebus obscuris, incertis, & vehementer arduis ad IESVM CHRISTVM censeo referendum.
auquel sera ceste année, & cest Esté ou vn chascun bon Chrestié aye recours: car les astres menassent grâdemēt de plusieurs disgraces les terriens par diuerses afflictions que si nous n'auons recours à ce grand Dieu, ie croy que plusieurs ne feront estime, & moins tiendront cōpte de ce que plus ilz souloient tenir precieux & cher. Les maladies seront aussi à craindre, non moins que affections pestilentes, innumerables fieures pestilentes, continues, tierces, erratiques, avec ce que la plus part du pays d'Espaigne par grande seicheresse & deffaut de pluye sera en extreme indigence de fromēt, la plus part mesmes le plus proche & peu esloigné de la coste marine. la terre sera si ardante par tout presque vniuersellement, que à plain midy l'on orra l'air grincer, & l'ardeur sera si vehemente, que presque nulle ame viuante pourra demourer deuant la face du Soleil: mais ce ne sera que à peu de regions: car le pais depuis Bourgogne, Bresse, Dauphiné, Vuiers, Poytou, Berry, Auvergne, partie de Languedoc, Querci, la Gascogne ne seront totalement priuez d'humidité: car il y aura des pluyes tellement impetueuses, qui emmeneront les nuces tellement espesses, & obscures pleines de tonnerres, gresles, fouldres, &

tempestes, qui beaucoup plus dōmagera les fruiçts, que
 la tant desirée pluye ne profitera, lesquelles pluyes serōt
 en aucune part continues, que apres que la plus part de
 cestuy Esté sera constitué en chaleur ardante, & seiche-
 resse sera cause naistre plusieurs & diuerses infirmités a-
 gues, tellement & si vehementes inextinguibles, que la
 nuict ny le iour ne se pourra trouuer place pour reposer
 les humains de la vehemente chaleur, par laquelle ne
 venons à preseger. *Causis quibus naturalis diuinitio nobis data est: sed cu-
 riosissime obseruatis cursibus rerum caelestium, signa tamen causarum & notas cerni-
 mus, quibus adhibita memoria, & solerti diligentia ex monumentis meorum auitum
 acquirimus eam caelestem diuinationem, non artificiosam: sed fulgentibus ostensu. mō-
 stris signisque caelestium nocturnis obseruationibus.* Cōbien que plusieurs
 par effrence calumnie me voyans faire circonlocutions
 me iugent de sens tout autre. Si est ce que pour venir au
 vray point du Presage de cest Esté que le fait bellique se-
 ra tellement empesché, que la mort la maladie, la capti-
 uité, & la facherie fera tel trouble, que de la partie la ou
 l'on pretendoit victoire, & tenir bon pour vn sera tout le
 contraire. Les stratagemes des guerres seront tellement
 practiquees & si nouvelles, que Polienus Macedonicus
 n'en traicta iamais de si subtiles, que seront deuers la To-
 scane & Romanie practiquees, & non tant seulement par
 eux, mais en diuerses contrees. Puis deuers le milieu de
 l'Esté courra vn vent Austral de telle chaleur & inflam-
 mation, que sur les champs il seichera promptement ce
 que sera proche de parfaicte semence: mais vrayment
 les vignes, ce peu qui sera demeuré viendra si tresfort à
 seicher, que si Dieu par son celeste arrousement n'y met
 la main en plusieurs lieux les cueilliez seront petites. les
 bœufs seront dangereux de pestilence bouine. Les Bar-

bars ne seront sans faire inuasiōs & tumultes bellique,
& à la coste de la marine plusieurs à l'aube du iour pilleries tāt des humains que d'autres robes. Le Rosne & autres riuieres deuers le principe de l'Esté sortirōt hors de leurs bornes, deuers la fin seront si basses toutes riuieres, que iamais auront esté, par la superabondāte seichereſſe seront trouuez dans riuage de fleuues descouuers excellents monuments, & par opposite par les fleuues & ruyſſeaux tenentemēt deuallez en serōt descouuers, la ou seront veux des escripts & cruches de long temps enseuelies, aussi l'estoille Crinite qui sera quelque peu apparante & non apparante fera manifeste iugement de ce qu'auindra tant au pays Italique, Hesperien, Germanique, & François, que sera tel, qu'il m'est meilleur ne le declarer que le manifester, pour deux causes, pour les calumniateurs & pour ne par trop intimider le peuple. les pestilences, flux diffynteriques tant en armee de mer, que de terre feront grand trouble & empeschement, par le feu du ciel seront nauires & vaisseaux marins perillez, & tremblement de terre aux parties orientales. Seront faites des entreprises tant secretes, que non occultes, que la plus part ne sortira à demy effect. par mer seront faits plusieurs & diuers naufrages, & pillés par galees, & sortira subitement, apres estre sorty du port diuers temps. Le lieu de fortresse occupé de pestilence sera tenté par expres, & secretz explorateurs. & seront enuoyees galeres deuers la fin de la mer Mediterrane & de la mer de Hercules pour entendre & expiller & passer la cité, qui est presque enuironnee des trois : mais ce sera bien en vain ce nonobstant les nouuelles qui viendront en France durant cest Esté, ne seront ne trop bonnes, ne trop mali-

gnes. Plusieurs capitaines feront en leurs esprits bien fachez, mais la pluspart de ceux qui auront par terre, & par mer exercé office de vaillant, comme la plus part fera ceste annee, ie treuve qu'ilz seront grandemēt esleuez en honneurs & plus grandes dignitez: & aussi ceste annee combien que soit apparence de tréue & longue paix que plustost desirēt lennemy viure pour plus longuemēt estre la ou ilz pretendent.

DE L'AVTOMNE.

Automne ceste annee 1557. commencera le 14. de Septembre, le Soleil entrât à 55. minutes de Libra, la lune à 15, deg. 17, minu. de Gemini par ses deux fera à son cōmencemēt chaud & humide, mais plus tendât à quelque fraicheur & siccité participant d'aucunes pluyes composees moyennant la continuelle chaleur de l'Esté passé, la terre sera tellemēt eschauffee que suscitera pluyes impetueuses, avec tonnerres & eclistres: mais non que deuers les parties du climat 6.7. & 8. que à ce dernier les broilatz commenceront à troubler l'air, & à cause que quelques iours deuât l'entree de l'Automne aurōt esté quelques pluyes, que le Pere Liber ne sera semblable à tel auancemēt qu'il à esté l'annee passée, cōbien que la plus part des planettes erratiques sont constituez en mesmes maisons, ormis ceux dont le cours n'est guieres dissemblable au cours Solaire, ny aussi lorientalité & occidentalité dicelles n'est cōforme, qui est cause que l'annee n'est si precox, & courront maladies de grandissime danger, & qui se prendront pour la trop contigue approximation d'icelles, & mesmes es regions latines seront grandement dāgereuses de pestilente cōtagion, non tāt seulement par terre, mais aussi par les classes marines, & des

principales citez:& dauantage deuers le commencement
la contagieuse maladie ne inuadera point les petis des
villes & citez, mais se prendra subitement aux plus appa-
rents, & en mourront si subitement, que l'on fera tout e-
stonné que auant que les Physiciens se soient auisez, les
languissans auront prins fin, & aux villes & citez ou tel-
le contagion aura le premier lieu, on ne congnoistra du-
rant iceluy pestifereux regne autre maladie que bié peu
les chiefs affligez au parauant ont donné presage à ceux
à qui la congnoissance celeste par le cōtinuel mouuemēt
n'est cōgneue, aux autres parties du mōde ou telle cōta-
gion n'aura lieu y courra fieures cōtinues, fieures que le
paroxisme ne durera gueres moins que de 24. à 36. heu-
res, avec vne chaleur ardante & inflammatiō par toutes
les parties du corps avec soif inextinguible, seicheresse
de langue, vomissemēt, fieures tierces par quelques iours
puis soy conuertir en quotidienne de long paroxisme.
fieures erratiques, dissenteries, flux de ventre, couleurs
iaulnastres, principes de hydropisies & à d'autres: vers la
fin du principe de l'automne destruction des superiores
fieures de l'Esté, & en dautres pour le residu des indeiues
purgations recidiues en grand nombre, & apres toutes
ces miseres & afflictions ce n'est pas assez, car ilz mour-
ront plusieurs personages, mesmes prelatz & gens ec-
clesiastiques, & des plus apparentz & personnes partie
aages & à demy de leur aage. Et en mourront de lordre
equestre, comme de lordre de prelature, & en la fleur de
leur aage, & des personnes qui seront autant de plaindre
comme de ceux à qui la mort n'a esté par nul temps desir-
ree, non comprins aussi que Mars qui est dans la 9. mai-
son, qui est Sagitarius, & combien qu'il soit occidental
si est

si est ce qu'il suscitera ires antiques, nonobstant les oppositions qu'il a avec Saturne & Iupiter, il suscitera telle guerre, que les paches de trefues & de paix n'aurõt lieu iusques à ce que les araires publicq. des inuincibles monarques soient remplis, & aussi pue le principe iouxte leur escript auroit esté fondé en constitution de domicile de petite duree. le Pere liber ne fera guieres en assureance par Aquarius qui avec sa couche le dommagera. Et pource qu'en Automne sera quelque bruit vain de la Cæsaree maicsté serõt inserés à la louange Gauloise par les Latins. *Dubie renuit insere. Atque aliquis metuens ne sit sine Cæsare Roma, elegit gallum cæsaris sceptrum dare* Deurs les Bigorons & les montz Pirenees seront faites quelques explorations tentatiues, que sans guieres tarder sortirõt en plain effect. Les guerres seront de nouveau suscitées, retourneront vn chascun en son terroir, nõ pas les deffailles. Toutesfois ie treuve selon le jugement du grand Albumasach en ses conionctions à cause que dans le reuolu d'Automne est vne conionction (combié qu'elle ne soit des grandes) du Soleil à Mercure qui se fabriquera diuinement par la main de Dieu eternal vne paix qui encores ne se treuve nullement: mais est entre les deux plus que inuincibles Lyons, & sera de telle forme & inuiolable confederation, que les regions sujettes à la martiale digladiation d'vne supreme reiouissance les assiegez de cœur chanteront. *Respice cristati florescunt ut lilia Galli.* Les autres plus beaucoup diront. *Et iure piate Deos. onerate altaria donis. Cum Cæsare Gallus foedera inire parat.* Mais tous telz proiectz, sera bien heureux le François qui ne sera aux parties Italiques, mesmes aux profondes regions. Pour n'estre par trop long, ie laisse à mettre les principaux

C

poinctz de ce qu'il aduendra deuers les regions Gauloises, & de la Germanie. & non moins Italiques. Que tous vnanimement prierons le grand DIEU eternal avec les sainctz, qu'il luy plaise nous preseruer de ce que nous menassent les Astres. Amen.

De l'Hiuer. 1557.

L'hyuer entrera le 12. de Decembre, le Soleil entrant au premier poinct du Capricorne, à 44. minu. la Lune à 25. deg. 43. minu. de Virgo. Saturne occidental meridi. ascendant cōbust. à 23. deg. 53. mi. de Taurus, Iupiter occidental meridional descendât à 14. deg. 48. mi. de Capric. Mars occidental meridional ascendant à 19. deg. 24. mi. d'Aqua. Venus occidental merid. descendât à 5. deg. 46. mi. d'Aquarius. & le reste selō leur ordre, lequel tout calculé sera en son commencement froid & humide avec neiges, glaces, grādes geles, vents, pluyes, broillats, tēps fort maling, & pluyes frequentes deuers les regions occidentales, & seront bruynes qui ne donneront moins d'empeschement que les pluyes: vray est que Mars pour son occidentalité fait apparoir aux regions suiettes à Aquarius que les guerres ny seront si biē assoupies, que deuers les pays qui desia de long temps sont preparez aux armes par Mars, comme sera par dela. Aussi ie treuue que deuers le pays de la Gaule Celtique qui est la superieure & inferieure Germanie que les pluyes deuers l'Autonne passé auront esté si frequentes que cest Hyuer sera si extremement froid & glacial, & de si longue duree par le continuel soufflement des vents Septentrionaux, que quelque pays n'vsant que des loix de leur pere en veneration Dionyse se leuerōt l'un cōtre l'autre à l'encontre des superieurs monarques & magistrats, que la

grand froidure luy seruira plus du printemps ou principe d'Esté, & ne sera exempt le pays contaminé que les plus principaux ne facent vne sociale coniuration contre leurs decretz & pristines voluntés seront faites incursions & assaillementz telz que lon dōnera excusation à celuy qui l'aura fait par deceptiue & presciente ignorance machinee par les plus superieurs. Quant au pays Italique, ceux des Gaules seront en extreme periclitatiō, le grand traditeur sera deshonté, & pour cela n'yra moins dans Rome. Les plus grands des Gauloys voudroient auoir passé les monts, mais ce ne sera sans danger de mal de plusieurs. La vindication sera suscitee en plus grande ire qu'elle ne fut iamais, encores que la dure & acerbe inclemence de l'air face & rende Mars du tout assoupy, si est ce qui s'en trouueront qui aurōt plus mangé que beu, & par opposite qui auront plus beu que mangé, ne sera esleu celuy qui pensoit. Le ieune sera preparé. Le meurtre ne sera du tout sorty en son effect, sera congneu le mauuaisvouloir que portoit celuy qui se faisoit tāt loyal & tant prudent, qui sera trouué bien infidele & desloyal, & à la fin ne faisant bien. O combien de facheries ie congnois, qui se preparent, & qui se veulent essaier de pacifier la terre, qu'elle sera en plus grand trouble qu'elle possible ne fuisse du temps que Nerou fit bruler Rome (Temporibus Neronianis arsit per nouem dies) Dieu vueille que ceste conflagration qui se prepare ne surpasse le terme que ne soit par vnze, & non tant seulement par ires & haines des habitants & antiques familles qui brulent d'vne cupidité incredible de conuoitise, qui ne veulent estrangier pour leur dominateur combien que ceux qui defendent les natiōs diront. *non semper*

Germania bibit gens nec Gallia superbit. mais sobre & prudér. Les maladies y seront grandes, & regneront fieures continues, qui n'iront pas long terme: mais seront iugees soudainemét. Quelque grand Prince sera fáché. Premièrement de soy estre expolié de ses forces, qui seront lointaines, qui ne luy peuuét donner faueur ne aide. Le secours sera loing, les detenez seront enferrez, les langues ne se accorderont non plus que les montz, & façons de viure. Apres telle facherie luy suruiendra vn mal de costé qui le fáchera pl^o, & luy fera oublier tout. Dieu veille qu'il voise bien pour luy & pour tous. Les pleuresies avec douleur pongitiue, toux, mal des yeux. catharres innumerablement, & grandes reumes, & defluxions. Les vieux seront quelque peu fachez, & seront paralysies, apoplexies, distillations de vielleffe insupportable, grands naufrages & submersions par mer & fleues. La guerre ouuerte sera du tout fermee. Mais se feront des preparacions par conseil, qui pullulera le Printemps de l'annee 1558. & de grand effect louable. En la grande court Royale ne seront point de simuletez. Aristides & Themistocles lairront leurs dissentions iusques á vn autre temps, & vsront de prudát conseil & louable toute la court Royale sera remplie de prouidence, rien ne se fera qu'avec vne grande ponderosité. Prierons Dieu tous qu'il nous vueille preseruer les grands, qui dans le contenu de cest hyuer seront en extreme danger de leur vie par maladies & autres pernicieux inconueniens, que pour obuier prolixité ie les laisse à mettre par escrit.

Des Lunes & quartiers de Ianuier.

En Ianuier sera le premier quart de la Lune precedéte le 7. à 21. mi. par cōiunctiō de Saturne à 16. deg. 43. mi. d'Aries qui sera froid & humide participant. de quelque temperature, avec pluyes & nei-

ges Te fait Martial assoupy. Pleine Lune le 14. à 12. heu. 57. minu. à 27. deg. 47. mi. de Cancer, qui sera par aquosité humide: avec quelque moderatiō, mais les broillars, neiges & geles serōt en vigueur faisant submerciōs & naufrages, iours peu-moderéz; nouvelles des Italies on agreables. Le dernier quart le 12. à 2. mi. 11. deg. 13. mi. de Scorpio, plus freiche-humide, neige, pluye grad vêt piquant plus que paruat. serōt des mutatiōs triples & quadruples. Nouvelle Lune de ceste annee sera mediocremēt bōne, que pleust à Dieu que celles qui s'ensuiuēt fustēt semblables sera le 30. à 2. heu. 12. mi. à 19 deg. 40. mi. de Aquarius, pluuiéuse tendant quelque peu à tēps moderé, puis froide.

FEVRIER.

Premier quart de la Lune de Ianuier le 6. à 4. mi. à 29. deg. 43. min. de Taurus, qui sera attrépé de chaleur & humidité & pl^e de froid, neige, glace, tēps incōstāt & muable, catharreux & distillatif. Pleine Lune le 13. à 2. heu. 8. mi. 3. deg. 54. mi. de Virgo: qui sera moderee, mais pl^e de vêt & froidure, que d'autre qualité, dōuers les parties Septentrionales & de midy serōt faites quelques traditiues embusches & deceptiōs, fort cathareuse & reumatiq^e pleuretique. Le dernier quart le 20. à 23. mi. à 5. deg. de Sagitarius, froid & sec, le tēps sera adōné à pluyes, mais quelque signe le demonstrent prepare à seichereffe. Nouvelle Lune le 28. à 15. heu. 47. mi. en Pisces, sera froide & humide, avec quelque chaleur qui auancera les biens de la terre.

MARS.

Le premier quart le 7. à 11. mi. en Gemini, qui sera chaud & humide, preparatiue de vaine entreprinse. la mer cōmencera soy preparer, les maladies renouelleront, pluyes & glaces, & puy bon temps. Pleine Lune le 14. à 16. heu. 18. mi. en Virgo, qui commencera à soy attremper. Dernier quart le 22. à 17. mi. 3. deg. de Capricornus. plus froid que moderé. Nouvelle Lune le 30. à 2. heures chaude & attrempee.

AVRIL.

Premier quart de la Lune le 5. à 18. mi. en Cancer, qui par quadrins aspects sera maling. Pleine Lune le 13. à 7. heu. en Libra, froide avec vêts Septentrionaux de Nhort, emotiōs belliques. *Gens auara nimis*

Tyrrhenū nauigat equor. & renouatiō de monarchie. mais les apelles ne voudront aller si fidellemēt, veu le danger. Dernier quart le 21. à 10. heu. en Aquarius. chaud & humide. pluuiex tendant à bon temps par la clemence de l'air. Lune nouvelle sera le 28. à 10 heu. en Taurus, chaude & humide faisant beau tēps, vent de North.

M A Y.

Le premier quart de la Lune sera le 5. à 2. heu. en Libra, froide & seiche. Pleine Lune le 12. à 22. heu. en Scorpio, qui sera plus freiche que chaude, & telle freicheur sera pestilēte & febricitāte. La mort d'vn grād aura presque assoupy la plus part du regne Italique. Dernier quart sera le 21. en Pisces sera pluuiex & humide rēdāt à bō tēps Nouvelle Lune le 27. à 17. h. 37. mi. en Gemini chaude & humide. Les maladies de fieures pestilentes, continues, charbons, inflammations flux de sang par mer, & par œuures Martiales. Dieu garde celuy qui vouldra nauiger au feu.

I V I N.

Le premier quart à 7. mi. en Virgo, qui sera chaud & sec, en plusieurs lieux seront fieures pestilētes, & charbons, le reste ie l'ay amplement declaré en mes presages. Pleine Lune le 11. à 15. heu 21. mi. en Sagittaire, qui sera freiche & humide de peu de duree. Dernier quart à 10. mi. du 19. iour en Aries, qui sera chaud & humide tendant à ardeur & seicheresse. febricitant. Nouvelle Lune le 26. à 9. heu. en Cancer, chaude & seiche. Mutation de grand Prince.

I V I L L E T,

Premier quart le 3. iustement au poinct du iour, en Libra, chaud & sec. Pleine Lune le 11. à 3. heu. en Capricorne, qui seravn peu freiche. Dernier quart le 18. à 16. h. en Taurus. chaud & sec tōnerres. Nouvelle Lune le 25. en Leo. chaude ardante, esmouuant choleres.

A O V S T.

Premier quart le premier iour, en Scorpio. tendant à variation. Pleine Lune le 9. à 17. heu. Dernier quart le 17. à 3. deg. 50. mi. de Gemini, chaude humide faisant temps maladif, & fieures continues. Nouvelle Lune le 23. en Virgo chaude & enflammee dōmageāt les fruiets par gresle qui correspondent au mois de Iuin. Le premier

quart sera le dernier iour en Sagitarius, les grandes chaleurs assoupyes.

SEPTEMBRE.

Pleine Lune le 8. en Pisces, principe de broillats. Dernier quart le 15. en Gemini chaud & humide. Nouvelle Lune le 22. à 5. h. en Libra froide, & seiche avec broillats. Premier quart le dernier iour en Capricornus, froid sec, machinemét de trahisó, báquet venimeux

OCTOBRE.

Pleine Lune le 7. à 13. heu. en Aries. chaude & humide. Dernier quart le 14. à 12 heu. en Canter, faisant amas d'aquosité. Nouvelle Lune le 21. à 20 heu. en Libra, froide & seiche, bruines espesses. Premier quart le 30. en Aquarius, pluvieux, froid, humide, roses blâche

NOVEMBRE.

Pleine Lune le 6. à 6. h. en Taurus, quelque peu moderee. Dernier quart le 12. à 21. heu. en Leo temps doux. Nouvelle Lune le 20. à 14. heu. en Sagit. froide, seiche, muable, incóstante, & pleine de bruynes. Premier quart le 28. à 19 h. en Pisces, sera pluvieux. froid & maladif.

DECEMBRE. 1557.

En Decembre sera pleine Lune le 5 à 16. heu. 58. mi. à 13. deg. 54. mi. de Gemini qui sera quelque peu attrempee, avec grâds vêts Septentrionaux & Australz. la teste du Dragó, Garde, garde pocilateur Itallique que tu as deliberé de faire. Dernier quart sera le 12. à 9. mi. sur le point Solsticial. 25. deg. 43. mi. de Virgo, ce que par impetuosité d'eau sera descouvert sera admirable & merueilleux, & plus horrible nouvelle de la coniuration & entreprinse. ô que sera dilaceré en menues pieces celuy de langue trop libere. Nouvelle Lune sera le 20. à 10 heu. 12. mi. en Capricornus. qui sera fort froide & seiche, avec vne humidité, qui causera l'hiuer estre treslong. Par la grand monarchie premiere de ce monde sera en poinct du plus supreme degré que iamais depuis le troisieme sang Troyé ayt esté, sa court sera munie de grand ioye. Simultes faintes caresses, dissimulatiōs d'œil tranuersant les pointes au costé gauche, bonesnouelles apporte. Premier quart le 28. à 11. heu. ventz terriblement froidz adurant comme feu, qu'on dira, penetrabile frigus adurit. Je prieray Dieu qu'il luy plaise par le moyen du precieux sang de son filz Iesus Christ no⁹ preseruer des mauuais aspects que les cieux no⁹ menassent, & me done grace que à ceux qui m'ot cogneu & no⁹ veu &

veu & non cogneu, qui se sont essayez me calumnier, sans que ia, mais à eux ny à personne de ce mōde n'aye fait, dict ne pensé faire desplaisir ny offense que ie puisse estre du nōbre de leurs amys & seruiteurs, & si ie leur auoys fait desplaisir en presageant qu'ilz me pardonent.

ALMANACH POVR L'AN M. D. LVII.

Nombre dor	XIX
Epacta Egyptienne	XXIX.
Cycle du Soleil	XXVI.
Lettre dominicallē	C.
Indiction Romaine	XV.
Entre Noël & le Dimenche gras	IX. semaines II. iours
Pasques	XVIII. d'Auril.
Rogations	XXIII. de May.
Ascension	XXVII. de May.
Pentecoste	VI. de Iuin.
La feste Dieu	XVII. de Iuin.
L'aduent	XXVIII. de Nouembre.

FIN.

EXTRAICT DV PRIVILEGE DV ROY.

Par priuilege du Roy. Il est permis à Jaques Keruer libraire juré en l'vniuersité de Paris, & Iean Brotot Libraire de Lyon de vendre & distribuer les Almanach Presages, & Pronostications, composees par maistre Michel de Nostre Dame docteur en Medicinē de Salon de Craux en Prouence. Et de fencer à tous Libraires, marchans & autres quelzconques, de n'en vendre ne distribuer autres que ceux que ledit Keruer aura fait imprimer, sur les peines contenues audit priuilege. Donnē à Paris le 14. d'Octobre 1556.